

山雲樓文鈔

郭柏蔭題籤

伯瀛

岷雲樓文鈔卷七

閩縣劉存仁炯甫篆

自題從軍圖後 咸豐九年

道光三十年歲次復觀自是朔候官林文忠公奉

天

子命督師粵西召死者屢咸幕感激知已願效馳驅瀕行命
工繪小影侍公以圖樞部招匝月行抵潮州普甯縣而疾作
公薨於行大星忽殞慟哭護輜南旋逾年補綴成圖今圖中
所繪卽潮州之湘子橋也圖成不忍復觀自是橐筆依人益
凄然無所向兩赴公車奔馳南北瀕死者屢咸豐五年乙卯
應制科試再來京師同里林穎叔壽圖樞部招同陳蓮裳鴻

壽銓部王少鶴錫振樞部孫琴西衣言編修錢蘋疋寶青廷尉集菴施草堂爲消寒第一集卽席出圖傳觀翌日諸君皆有詩以圖未裝池遂各以別紙錄贈久置行篋不復省憶七年丁巳制科召試蒙

恩出宰需次蘭州九年己未四

月權莊浪同知公退無事裝是圖成幅因補錄諸君贈詩於右一以誌老成彫謝之悲一以寓友朋離合之感而留都之憔悴待序之困頓歷歷情狀恍然在目星霜又將十載矣鬢星眼霧俯仰隨時萬里一宮倦遊傷別回憶前景雄心灰冷能勿感慨係之邪抑余尤有感者道光二十五年公由伊犁蒙

恩賜環權陝甘督旋授雲貴督以平漢回滋事軍

功晉 宮衛 賞戴花翎乞骸歸里未半載

今上御

極詔起視師存仁寇仕苦晚不獲從屬寮後侍公於陝甘督
之時親承訓誨講求民瘼以勉爲循吏而徒以戎旃侍公維
時粵寇嘯聚聞公至漸次解散星火涓滴猶可挽回惜天不
假年出師未捷而身先死公薨之後一潰於江右再潰於湖
襄長江順流金陵失守賊勢蔓延吳楚皖豫間波及閩粵而
吾閩之上游旁郡丁巳戊午亦屢遭蹂躪大江南北師老餉
糜迄今禍猶未艾設公尙在雖不敢謂一鼓蕩平決裂當不
至此豈非氣數使然邪存仁旣不幸從軍不獲戴事是圖特
雲煙之過眼耳今者蒞公舊治之屬邑憬然遐思愴然感舊

相距纔十五六年軍需餉匱甘省協餉不以時至吏治民情
逼蹙煩急岌岌如不終日恨不及見當年物力之饒風尚之
美徒以偃蹇落拓無可自奮於末職以答公靈於地下萑鱸
烽火進退兩難兄弟妻孥相隔萬里垂老思歸初衣難遂蹉
跎末吏心神黯然人非木石未有不悽愴而生悲者觀斯圖
也顧瞻風會愴念時艱將不勝人心世道之隱憂豈特身世
蒼茫轉眴今昔之感云爾哉

觀風示

咸豐九年六月任莊浪同知作

爲端士習以正文風事照得吏治資乎人才人才由於學術
今日庠序之子弟卽異日之公卿大夫也可不思拜獻先資
窮經以致用歟本分府筮仕此邦歷閱課試各卷甘省不乏
美才平番亦多佳士特根本不盛無經史以發其光華平正
通達者固多英華卓犖者頗少由汲古之功欠耳夫士以敦
品勵行立志爲先原不在區區文藝之末然卽以舉業而論
約六經之旨以成文方能出奇制勝至於沈約四聲塲屋尤
宜亟講諸生豈可忽而弗求本分府束髮受經頗嘗甘苦少
懵於道老而無成於文章之源流正變頗能言其一二竊願

與諸生講學特不能家喻而戶曉也今亦不敢高語精微只就明白易曉者爲諸生勗附錄伊順行讀書說一篇於後誠初學之階梯訓蒙之圭臬也善乎許昌靳裁之之言曰志於道德者功名不足以累其心志於功名者富貴不足以累其心願諸生有志向上共底大成毋視制義爲取富貴之具恪遵山長之訓誨毋負本分府厚望之苦心也特諭

循循善誘俗吏所不能爲

圖讀

剴切曉諭疊疊動人

型謹識

立課程以勵實學示

咸豐九年七月
十日任莊浪廳作

爲立課程以勵實學事照得化俗必先勤學育德所以興賢
本分府職司滿餉茶務管轄番民三十六族不理民間詞訟
雖不必越俎代庖下車以來流交雀鼠細故早已解釋訊結
竊念筮仕此都有臨民之權尤有教士之責士爲四民之首
欲化民自教士始古者春秋教以禮樂冬夏教以詩書三年
大比鄉大夫選其賢能者而賓興之是教士與試士並行也
後世試密而教疎非先王立法之本意何以言之學使者輶
車所至駢征靡遑有司官案牘勞形有教士之實心而無教
士之隙晷學博士間曹冷署習爲具文諸生終無有過而請

益者問其所業則習制舉也限繩尺也而淑性陶情之意荒矣夫古者以六德六行六藝教士六藝之中又分爲禮樂射御書數區區文藝又六藝之末者耳士旣不得師儒講習之益又不得絃誦飲食之資衣奔食走與凡民等於是趨一而途百有庠序其躬市井其行者矣卽有廉隅自勵多貧困不能自存士氣之不揚士節之不勵職是故也近世所僅存先王庠序之遺意者在書院而教士之權尤責在山長今幸平番縣學葛學師兼攝山長爾諸生童所心折而誠服者也夫生同里則情易親素所心服則其教易入本分府前經出示與諸生童講學望之甚厚教之綦詳諒亦諸生所樂聞亦前

此所未嘗聞也又憫平番多美材而鮮淵源茲更創爲答問
一法諸生童各立一課程簿或山長發難或自己讀書有得
登記簿上或經或史或詞章詩賦時務策月或三條五條或
數十條呈請山長解釋其幼不能問者聽學記曰幼者不能
問則告語之亦古義也此法簡明易行亦足以覘勤惰積寸
成尺積絲成匹蛾子時術學以累而成也月終由山長披閱
改定彙送本署本分府行篋無書難以校勘倘有一得之愚
可裨益諸生童之萬一隨卽批改解釋發還此在少年穎悟
者從此發憤向上不惑歧途卽有老成宿學者各據心得雖
無選舉薦剡之榮亦可得文字知己之感此本分府相與有

成之私心也况由此學成而上出則黼黻鴻業卽處爲鄉里
善人亦不失爲陳烈王彥方爲里鄰所矜式清訟源端化本
皆於是乎寓記曰如欲化民成俗其必由學乎諸生童慎聽
吾言勿忽三閱月以後本分府親臨課試再爲諸生童勗特
示

語語從肺腑中流出具見誘掖苦心

型謹識

肫懇之意真切之言

崧注

致林方伯書 同治四年乙丑二月念三日

穎叔仁兄方伯大人閣下存仁賦性頑鈍居家時蒙鄉里先生誘掖不敢妄自菲薄衣奔食走所學無成年五十始博一官去家萬里出都之日良朋密友期我甚厚私念與其爲鄒枚不如爲魯卓稍稍可自見於世入廿十載浮沉隨俗面目都非輪困鬱勃之氣抑遏而不敢露僉以爲樸訥而易之亦不以爲忤也時時流露於五七言間踽踽涼涼不敢踰越尺寸官事牽纏遂初無計乃耄至智昏永昌一局助餉墊糧墜入火坑不能復振自分老死絕域永無生機旋聞秉節三秦佐聖天子承流宣化欣快累日竊嘆吏治肅清則民

生安堵弭盜有方召禍有階徇匪之亂未必非庸吏貪黷養
癰所致雖老生之常談實救時之良藥東南賢大吏主持風
紀小醜肅清其明驗也乃蒙敷政餘閒忽荷篤念窮交暨冰
如觀察力薦帥幕以曾隨林文忠公西征贊襄戎務相引援
穆帥謬採虛聲附片入 告惜不提粵遊一語不遇命也回
憶粵遊時高牙大纛幕府沉沉清華典重談吐自如戎機要
竅時參末議距今十六載矣精神才力衰憊迥異曩時祇以
齷齪下吏微名幸達 九閭重違大君子薦引之意軍帥知
遇之恩冬月捧檄草草束裝省寓斷炊聽其典貸過日窮冬
朔雪易車而騎出沙漠無人之境窮廬毳幕冒凍耐饑臘底

辛苦到營下榻安硯眠食困頓過於忙隸卒役廝養羣處喧
囂神智益困環顧所司文案不過一胥吏優爲之事下吏鬬
茸差可勉應而共濟時艱之初心嗒然若喪不特今昔之感
眞有霄壤之懸嗟天事未易爲俗人言也引嫌循例三肅寸
丹未罄所懷邇者睠念大雲再申前說夫綠綺銷聲則鍾期
短氣青萍斂鏑則薛燭蒙譏燕王雖馳市駿之聲而羊公終
有舞鶴之誚眷言摯愛感與愧並計甯郡克復爲日尙長昨
董琴虞書來以隨營日久得缺愈遲子銀歲增千金更難自
活一一如存仁胸中所欲言非肝膽至交雖有先見之明不
肯作此語讀竟感而且泣愈嘆際遇之屯神思之鈍也元夕

復浼舒西園大令達軍帥以老境窮途不堪鞭策願遣回省
副軍帥有出關之信西園勸令暫耐靜候楊制府前來且通
省無完善之區百里何處着手古人云哀莫大於心死孤羈
萬里私債如山萬念俱灰不堪設想是有命焉非人力之所
能爲也營中自辰至亥僉役紛擾神魂俱喪三更人靜稍稍
斂被危坐半晌客寓無書默自記憶稍有私悟擬劄一篇曰
惕恐錄取乾以惕无咎震以恐致福之義垂老思歸首邱何
日惟有素患難行乎患難生死置之度外朝聞夕死順受全
歸此心亦復坦然儻異日還鄉談從軍故事支離困頓情狀
覆視之躍躍紙上啞然自笑亦爽然出涕亦自遣之一法也

生平重骨肉師友恩誼今無可奈何惟心死二字割斷恩慈
爲養生妙訣所遇風霜寒暑疫癘幸不相侵頑鈍微軀非敢
曰元氣爲舟可敵百癘亦以心死則無嗜好無嗜好故無累
無累故無病理或然歟同事病友對床病疫穢氣薰蒸苦無
可避奄奄待斃七八日矣客死可憫且傳染自危念其庸手
誤投細意體察病根以古方參新意投一劑而瘥再五劑則
復元矣僉以爲神效其實存仁不習醫情急細審明確其不
死由其天數古稱衛青不死由天幸李廣無功緣數奇以小
喻大天下事由幸中而貪天功者比比如是嗣後療治兵役
二三人得活詘然中止堅不肯承學醫人費之詎始嘆醫國

之手卽才力不及古人得一實心任事者爲之竭其股肱之力繼以忠貞亦足以奏小效若夫不見歧黃之書麤識本草欺村氓爲兒戲鹵奔滅裂或蓄疑敗謀或復諫自用臨症下藥茫無把握其禍比庸醫殺人爲更烈能不寒心無聊閱方書述近狀博故人一哂拉雜不次卽請勛安